

Date – 28/08/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Sorkar laipui scheme RKVY 2023-24 hnuaia sak “Edible Oil Processing Plant” chu vawiin khan Agriculture Minister Pu PC Vanlalruata’n Falkawnah a hawng.
- 2. National Sports Day chu vawiin khan Sports & Youth Services Minister Pu Lalnghinglova Hmar hovin Aizawl SAI Centre ah hman a ni.
- 3. Prime Minister Narendra Modia chuan kum 12 chhungin Jan Dhan Yojana chuan hmasawna leh insiamthatna nasa tak a thlen a ti.
- 4. Nepal tuilian avanga thi zat chu 469 an tling tawh a. Mi 1545 chin hriatlohin an la bo.



RKVY-DPR EDIBLE OIL PROCESSING PLANT

Rashtriya Krishi Vikas Yojana 2023-24 hnuaia sak “Edible Oil Processing Plant” chu vawiin khan Agriculture & Farmers Welfare Department Minister Pu PC Vanlalruata’n Falkawn, Aizawl-aha hawng a. Minister hovin khawl hnathawhdan enchhinna hlawhtling taka neih a ni bawk.

Pu PC Vanlalruata chuan Mizoram chhungah ngei oilseed herna tha tak neih a ni ta chu lawmawm a tih thu sawiin, changtlung taka a thanlen zel theihna turin duhsakna a hlan a. Sawrkar chuan loneitute a ngaipawimawh a; hma an sawn zel theihna turin department pawhin RKVY scheme atangin theih ang anga kawng a zawnpui zel tur thu leh cooperative society-te parchhuah theihna tura hma a lakpui zel tur thu a sawi a. Sawrkarin sawhthing a buaipui mek pawh chu processing lamah tan lak zel an tum thu sawiin, sawrkar chu farmer-te tan a inhawng reng a, anmahni chhawmdawla, an mamawhte phuhruksak zel chu sawrkar anga an tihtur a nih thu a sawi bawk. He huna lo tel ve Falkawn VC-te pawh chu an khuaa he plant bun a nih ang ngeiin a hmunhma venhim leh enkawl kawnga hma lakpuia, uap lum zel turin a sawm bawk a ni.

He tel herna hmun (edible oil processing plant) ah hian thlai hriak nei chi reng reng chu her theih vek a ni a. Khawl hi Agriculture & Farmers’ Welfare Department

chuan tender chhangtu Aizawl City Oilseed Growers and Processing Cooperative Society Ltd. chu enkawl tura thlangin, MoU kum 5 chhung daih tur chu vawiin khan a sign pui a ni.



HOME MINISTER

Home Minister Pu K Sapdanga’n Human Rights Commission in khawtlang thenfai kawngah dal a neih awm hriat a ni lo a, Harsatna a thlen hriat a ni lo a ti.

Nimin Assembly Session- zawhna chhangin Home Minister Pu K Sapdanga chuan member te zawhna chhangin State Human Rights Commission hi din tura tihna rei tawh an sorkar din hma daih atanga lo intan tawh a ni a ti a, hun pawh a duh rei a, State Human Rights Commission Chairman tur pawh Mizoram State chhungah qualify an awm lo a ti a, tualchhung mi qualify ngei duh an duh bawk avangin Gauhati High Court Chief Justice-te nen pawh he thil hi sawiho a ni a, chuvangin, loh theih loh vanga din tih chu thudik lo a ni lova, thunei tu sang atang nawrna a nat em avanga din a ni ta a ni a ti.

Mizoram ah chuan khawtlanga hnawksak thil te nuai bo turin sorkar tha chakna mai bakah Ngo te nena tankawp a ngaih chang awmin Mizote chu NGO nei tha ber an ni a, din tura nawrna a nat em avangin din ni in , heng te hi thleng lo se chu sorkar hmasa te ang tho a din kher a ngaihna an hre lo a ti.

Pu K Sapdanga chuan State Human Rights Commission ah hian thla li lek member pal lak anih chhan chu, din turin hun a duh rei vang a ni a ti a, a tir atanga lak ni se chuan kumkhat chhung thawk a tling thei ang a, amaherawhchu an inpeih fel vek hnuah thla li bak a thawk theih dawn loh avanga in hnuhduh a duh thu te sawiin, Advertisement an chhuah tirh ah pheih chuan dil tu an hmuh loh thu a sawi bawk.



NATIONAL SPORTS DAY

National Sports Day chu vawiin khan Sports & Youth Services (SYS) Minister Pu Lalnghinglova Hmar hovin Sports Authority of India (SAI) Training Centre, Aizawl Mission Vengthlangah hman a ni.

Minister chuan National Sports Day chu Mizoram infiammite hma lam pan tura tan an lak thar ni ni se a duh thu a sawi a. Hun inher mil zela inzir thar zel tur leh theihtawp chhuah turin infiammite a fuih a. Minister chuan National Games-ah leh India ram pum huap inelnaah te Mizoram a hnu dala a tang fo mai chu a ngaimawh thu a sawi a. Sawrkar pawhin theihtawp a chhuah mek thu sawiin, infrastructure tha mamawh anih rualin a awmsa te hman tangkai a tul thu a sawi bawk a. State dangte hnunga tawi reng lova mite ruala hma sawn tum tur leh hmasawinna tura rawtna an neih apiangte hotute hnena thlen zel turin infiammite a sawm bawk a ni.

Inkhawm hi SYS Director Pu Henry C Lalrawnkima’n a kaihruai a. STC Centre-in-Charge Pi Elizabeth Lalnunmawii Colney kaihruaiin kalkhawmte hian an taksa leh rilru hriselna ngai pawimawh tur leh infiamna chawi sang a, an chhungte leh an thiante pawh infiamna lama tui tura fuih turin thu an tiam rual a ni.

National Sports Day lawm nan Sports & Youth Services office hrang hranga thawkte - Secretariat, Directorate leh MSSC, KISCE, NCC, NSS, SAI leh infiammite chu Group paliah inthenin infiamna chi hrang hrang: Futsal (Men), Volleyball (Women), Arpa Insual (Men), Inkawibah (Women), Dodge Ball leh Dart Throw hmangtein an intihsiaak a ni.

National Sports Day hi India infiammi ropui Major Dhyand Chand-a piancham August ni 28-ah kum 2012 atang khan kum tin hman a ni a. Mizoramah pawh a lawmna pui ber SAI Training Centre-a neih a nih bakah District tinah lawm a ni bawk.

National Sports Day pual hian vawiin khan Vairengte school hrang hrang ah an remchan dan angin naupang te chu infiamna chi hrang hrang an neih pui a, Pledge sawi rualna na hun te hmangin khawchhunga infiam mite sawmin hun an hmang a ni.



MPCC

Congress vice president Pu C Ngunlianchunga, MLA chuan Chief Minister Pu Lalduhoma chu ram tana Pa nih tling loah puhin, rorellai ZPM party chu 'kan ti lo ang' an tihte ti leh si an nih thu a sawi.

Pu Ngunlianchunga chuan vawiin khan an party chhung inkhawmah thu sawiin, Assembly Session neih zawh takah Mizoram State human Right Commission leh ILP chungchangah Chief Minister Pu Lalduhoma chuan hlah a ngah lutuk niin a sawi a; Pa berin fate hnenah hlah tur insawi thaih reng hi a tha lo a, chumi avang chuan at huai tur erawh a ni lo. Pa chuan mipui zinga sawi tur thlir hran thiam tur a ni a, hriat zawng zawng sawi chhuah hi a tha lo, a ti.

ZPM sawrkar chu inthlan dawna an insawi loh anga awm, 'kan ti lo ang' an tihte ti lehsiah puhin Pu Ngunlianchunga chuan, electric bill tih san loh an tiam pawh an intiam loh danin an awm tih a sawi a; 'Kan ti lo ang' an tih pawh 'kan ti ang' tiin an inlet ta, a ti a, sorkar chuan mipui a bum nasa tih a sawi.



WORKSHOP - POSH ACT, 2013

Akashvani Aizawl chuan vawiin khan an conference hall-ah Akashvani Aizawl hnuaia thawktute pualin 'Workshop on Prevention of Sexual and Mental Harassment' an buatsaih a; AIR director Pu DR Lalropuia'n a hmanpuuin, resource person chuan Mizoramah hetiang kaihhnawih thubuai hi ala awm loh thu sawi.

Workshop-ah hian hnathawhna hmuna mipat hmeichhiatna kaihhnawih hleihlenna thleng avanga rilru leh taksa hriselna nghawng thei thil thleng thei laka inven dan tur leh, hetiang thil a lo thlena hmalak dan turte zirho a ni a; Resource Person Advocate JH Lalbiaknungi chuan Sexual Harassment of Women at Workplace (Prevention, Prohibition and Redressal) Act, 2013 (PoSH Act, 2013) behchhanin kalkhawmte thil pawimawh hrang hrang a hrilhfiah a; sawihona leh zawhna leh chhanna hunte hman a ni.

Pi Lalbiaknungi chuan, PoSH Act, 2013 hian mipat hmeichhiatna lam hawia taksa inkhawih leh mipat hmeichhiatna hmang tura inthlemte, thlalak leh video dukdaklo inentir te, tawngka leh chetzia hmanga mei nei deuha in chhaih te, mipat hmeichhiatna kaihnawih hmanga hotute tlawn emaw, hnuaia thawkte thlem ang chite bakah, hnathawh ti nuam lo tura tawngkam leh chetzia hmanga lantir te, hmalam hun tiderthawng thei tura invauna leh hriselna leh himna tiderthawng zawnga chetnate a huam vek tih a sawi.

Hnathawhna hmunah mipat hmeichhiatna rawngkaia hmeichhiate zahawmna tibawrhbang thei zawnga thusawi emaw, kutthlak a awm loh a, ngaihngam taka hna an thawh theih nan sorkar leh private office-ahte thawktu mi 10 aia tam awmna chinah chuan Internal Complaint Committee emaw, Local Complaint Committee emaw din theuh tur a ni a; Committee member zaa 50 hi hmeichhia an nih ngei a ngai a, committe kaihruaitu chairperson pawh hnathawhna hmuna hmeichhia senior ber emaw hotu ber emaw a nih a ngai bawk a ni.

<><><>

MNF

MNF Adviser Pu Rashik Mohan Chakma, MLA chuan Chief Minister Pu Lalduhoma chu thil hrechiang loa thu sawi thinah puhin, MNF party chuan mipui tana tha lo tur chu an do zel dawn tih a sawi.

Vawiin khan MNF party chhung inkhawmah Pu RM Chakma hian thu a sawi a, Chief Minister Pu Lalduhoma chuan thil hrechiang loin a duh duh a sawi niin a sawi a; thil hre chiang loin a duh duh a sawi mai a, thudiklo hmangin zoram hi a kai hrui a ni, a ti a; Zoram mipuite hian hetiang thudiklo sawi ching leh sawi anga awm lote hi an hnawl ngam a tul a ti.

Pu RM Chakma chuan Assembly Session neih zawh taka thil thleng hrang hrangte kha MNF party leh opposition-te hlawhtlinna a nih thu a sawi a; smart meter chungchangah mipui tam tak tana harsatna tawh an sawi chhuahte chu sawrkar mek ZPM party-ten an bengkhawn duh lo tih sawiin, sorkar hian smart meter hi hman chhunzawm a tum a. Mahse, MNF party chuan mipui tana tha lo chu a do zel dawn a ni, a ti bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

BJP

Mizoram BJP President Dr K Beichhua, MLA chuan India rama sorkar leh tura beisei awm ber chu BJP an nih thu sawiin Mizoramah pawh chutiang tho chu a ni a ti a, kum 3 chhungin mipuiin ZPM sorkar lakah an beisei ang an hmu lo tih a sawi.

Dr K Beichhua hian vawiin khan an party pisaa political session-ah thu sawiin, kum 2028-ah Mizoramah BJP sorkar a pian ngei theih nan Central lama an hotuten an pui dawn tih a sawi a; India ramah sorkar leh tura beisei awm ber chu BJP a ni a, Mizoramah pawh chutiang tho chu a ni mek a, Mizoram siamthatna tur atana a taka hna thawk thei tura beisei awm ber chu BJP hi a ni, a ti.

Mizorama sorkar lai ZPM chu mipuii kum 3 an enchhin hnuah an beisei ang an hmu lo tih sawiin Dr K Beichhua chuan, tun anga an kal zel chuan mipui hian an beisei ang an hmuh a rinawm vak lo. Sorkar tawhte lah Congress party an hrechiang em em tawh a, MNF lah mipuiin an hnè a la reh bawk si lo, a ti a; BJP hmabak a êng ber tih a sawi bawk.

<><><>

JAN DHAN

Prime Minister Narendra Modia chuan kum 12 chhungin Jan Dhan Yojana chuan hmasawnna leh insiamthatna nasa tak a thlen a ti. Social Media ah he thu hi tarlangin Pu Modia chuan Jan Dhan Yojana chuan mitin huap leh ban phaka sum relbawlna a thlen a tih sawiin sum lamah mipuite dinhmun a thuamchak a ni a ti.

Pradhan Mantri Jan Dhan Yojana hnuaiah hina vawiin thlengin bank account vaibelchhe 59 chuang hawn tawh a ni a. Heng account-a sum dah zawng zawng hi cheng vaibelchhe nuai 3 sing 1 leh sang 7 chuang a tling tawh a. He scheme hi kum 2014 vawiin angah khan Prime Minister Narendra Modia chuan a hawng a. Khawvela financial inclusion hmalakna lian ber a ni.

<><><>

NEPAL

Nepal tuilian avanga thi zat chu 469 an tling tawh a. Mi 1545 chin hriatlohin an la bo. Chhanchhuah hna ngawrh taka thawh mek a ni. He chhijatna thlengah hian India mi 290 chu chin hriatlohin an awm mek bawk a ni.

Hetihlai hian Vawiina China chhimthlang lam Sichuan Province-a magnitude 5.1 a na lirngching chuan Nepal-ah tuilian a thlen leh thei nia sawilawk a ni. Thuneitute chuan Trishuli hmuna cheng te chu lui tui chim chin a san zel avangin inthiarchhuak turin an ngen a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 137-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>